



SAOPĆENJE/SAOPŠTENJE ZA JAVNOST

(Sarajevo, 08.11.2012. godine) – Povodom nedavno objavljenih dogovora političkih lidera u Bosni i Hercegovini koji se, između ostalog, tiču i oblasti pravosuđa, a koji su uzdrmali kako domaću javnost tako i predstavnike međunarodne zajednice, članice Mreže pravde u BiH najoštrije osuđuju pokušaje podriivanja pravosudnog sistema sadržane u navedenom političkom dogovoru.

Članice Mreže pravde napominju da Visoko sudsko i tužilačko vijeće BiH (VSTV BiH) ima zakonom propisanu ulogu koja ne smije biti ugrožena političkim utjecajem, a što je posebno istaknuto u okviru preporuka Venecijanske komisije kao i u okviru Strukturiranog dijaloga između Evropske Unije i BiH. Održavanje i unaprjeđenje neovisnosti pravosuđa predstavlja i značajan dio *Strategije reforme sektora pravde* usvojenoj od državnog i entitetskih ministarstava pravde, te Pravosudne komisije Distrikta Brčko. Članice Mreže pravde u BiH su mišljenja da uloga VSTV BiH u nastojanju očuvanja nezavisnog, nepristrasnog i profesionalnog pravosuđa ne smije biti ugrožena, te daju punu podršku daljem jačanju i podizanju kvaliteta ove institucije u skladu sa najboljim evropskim praksama.

Mreža pravde podsjeća da izvršna i zakonodavna vlast u BiH već imaju zakonom propisane pozicije, odnosno, svoje članove u VSTV-u BiH te zaključuje da svi moraju poštivati nezavisno pravosuđe kao treći ravnopravan stub vlasti, a da sudije i tužiocu moraju biti slobodni da rade svoj posao bez političkih ili bilo kakvih drugih pritisaka.

Dalje jačanje nezavisnosti, profesionalizma i efikasnosti pravosuđa, pa i utvrđivanja mehanizama demokratske odgovornosti nosilaca pravosudnih funkcija svakako je imperativ BiH. No, članice Mreže pravde izražavaju čvrst stav da sve aktivnosti usmjerene u tom pravcu ne treba da budu vođene isključivo od strane političkih elita, već u njihovo formuliranje treba da bude uključena šira, naročito stručna, javnost, te organizacije civilnog društva.

Mreža pravde u BiH je mreža 63 nevladine organizacije i profesionalna udruženja koja djeluju u oblasti vladavine prava i zaštite ljudski prava u cilju podrške efikasnosti, neovisnosti i odgovornosti pravosudnog sistema Bosne i Hercegovine, kao i kvalitetnog informiranja, obrazovanja i zastupanja interesa građanki i građana u sektoru pravde. Lista članica i informacije o aktivnostima Mreže pravde su dostupne na www.mrezapravde.ba

